



REPÚBLICA DEMOCRÁTICA DE TIMOR-LESTE

GABINETE DO PRIMEIRO-MINISTRO

ALOKUSAUN

SUA EXELÊNCIA PRIMEIRU-MINISTRU NO MINISTRU DEFEZA

I SEGURANSA

KAY RALA XANANA GUSMÃO

**IHA OKAZIAUN ABERTURA SEMINÁRIU “ ASISTÊNCIA
ENGENHARIA MILITÁR BA KONSTRUSAUN PROJETUS
NASIONAIS, DEZASTRES NATURAIS NO REKONSTRUSAUN
PÓS-KONFLITU – SITUASAUN IHA TIMÓR-LESTE”**

25 Setembru 2009

Hotel Timor, Díli

Exmus. Senhores Membrus Governu
Distintus Deputadus
Exmu. Senhor Xefe Estadu Maiór Jenerál Forças Armadas
Exmus. Representantes Korpu Diplomátiku
Membrus Forsas Armadas, Polísias no Protesaun Sivíl,
Distintus konvidadus no oradores internacionais

Senhoras no senhores,

Uluk nana'in ha'u hakarak ható liafuan apresu ba organizadores Semináriu ida ne'e nian, liu-liu ba maluk sira hotu ne'ebé haknaar iha Sekretaria Estadu Defeza, ne'ebé servisu maka'as tebes atu iniciativa ida ne'e bele hetan susesu i, klaru, ba Sekretáriu Estadu Defeza, Dr. Júlio Tomás Pinto.

Semináriu ne'ebé foin primeira vez halo, kona-ba assistênsia militar ba konstrusaun projetus nasionais, dezastres naturais no rekonstrusaun pós-konflitu iha Timór-Leste, ne'e tema ida ke atuál tebes no refleto empenhu Governu nian atu kria ambiente seguransa no estabilidade, ho forma transversál ba instituisoens Estadu nian tomak i, naturalmente, konta mós ho ita nia parseirus nasionais no internacionais sira nia tulun.

Tanba objetivu ida hotu husi semináriu ida ne'e mak oinsá bele buka komprende papél fundamentál Forsas Armadas nian iha konstrusaun Nasaun no iha desenvolvimentu comunidades, mak ha'u hakarak destaka katak Forsas Armadas hanesan pilár fundamentál ida hotu ita nia Estadu nian i bele dehan mós katak tuir loloos sira mak embriaun ka dubun Pátria timorense.

Iha períodu ida ne'ebé ita foin celebra 10º Aniversáriu ba ita nia liberdade, timór-oan tomak, tantu jersaun atuál no aban-bainrua nian, hotu-hotu tenke agradese wa'in tebes ba mane ka feto sira hotu ne'ebé serve iha FALINTIL durante tempu Rezistênsia, tanba ho sira nia sakrifísius mak ita bele sai benefisiadus. Karik sira la iha mak ita sei la mai hamutuk iha ne'e.

Senhoras no senhores,

Ita hotu hatene visisitudes ka difikuldades oioin ne'ebé F-FDTL hasoru dezdeke timór-oan tomak, interpreta didi'ak aspirasoens lejítimas husi partes ne'ebé kaer destinu povu ida ne'e nian, deside duni atu mantein nafatin Forsas Armadas Estadu Independente foun ida ne'e nian. Ita hanoin hikas fali difikuldades boot ne'ebé uluk ita hasoru atu bele impoin ita nia vontade ba ema sira ne'ebé hanoin katak ita nia Nasaun la presiza harí forsa defeza.

Ita moris iha mundu ida ke muda beibeik. Iha tinan sanulu ka ruanulu resin laran, ita asiste ameasas foun ba páz no estabilidade mundiál ne'ebé tekitekir mosu mai, temi naran ameasas naun-konvensionais, ne'ebé bele tau iha perigu Estadu independente ida nia Soberania.

Ezemplu flagrante ka loloos nian kona-ba realidade foun ida ne'e mak terrorizmu internasionál, ne'ebé bele akontese iha kualkér parte iha mundu, i la iha País ida mak bele sés-an husi kalamidade ka dezastre boot ida ne'e.

Hosi parte seluk, alterasoens klimátikas ne'ebé rejista daudaun iha ita nia Planeta provoka mós katástrofes ka dezastres barak, sai ameasa boot ba seguransa no ba ita hotu nia moris, liu-liu ba populasoens indefezas ka kbiit laek sira.

Mai ita haré kazu foun balu ne'ebé foin mosu iha ita nia rejiaun, kona-ba dezastres naturais ne'ebé boot tebes: hahú hosi rai-nakdoko iha Xina no Indonézia, udan boot no bee sa'e maka'as iha Myanmar to'o ahi hán-rai iha Austrália, ne'e hanesan ezemplus balu de'it.

Timór-Leste mós vulnerável atu hetan dezastres naturais, hanesan tempu bailoron ne'ebé naruk tebes, anin boot ne'ebé sobu sasán hotu, rai-nakdoko, udan boot no bee sa'e maka'as i tsunamis. Aat liu mak hanesan iha ita nia kazu, ita la iha sistemas teknolójikus hodi alerta ka aviza ema i, sorti boot, tanba ita seidauk iha experiênsia, katak seidauk hasoru kalamidades boot hanesan ne'e.

Senhoras no senhores,

Tanba realidade atuál hanesan ne'e mak ita tenke estuda konseitu foun ida atu emprega ka uza Forsas Armadas. Atu bele hatán hasoru dezafiu ida ne'e maka harí ona iha Sekretaria Estadu Defeza, Grupu Estudu 20/20.

Inisiativas tomak ne'ebé bele kontribui ba estudu ida ne'e, naturalmente, ami simu ho liman rua. Tanba ne'e mak semináriu ida ne'e importante tebes, liu-liu tanba atu koalia no tetu didi'ak kona-ba possibilidades atu emprega Forsas Armadas iha áreas ne'ebé la halo parte defeza territoriál Nasaun ida ne'e nian, tuir nia kontektu rasik.

Konseitu Seguransa Nasionál ne'ebé Países avansadus barak mak komesa halo fali ona revizaun, relaciona ho kestoens doutrina militar, hatudu katak fronteira ka diferenca entre defeza nasional ho seguransa interna ladun kle'an ona. Fronteira ne'e kloot ba daudaun, atividades ne'ebé desenvolve iha área rua ne'e nian atu kompleta malu, tanba labele haketak duni malu.

Timór-Leste foin daudaun ne'e, hetan experiénsia ida ke bele komprova efikásia aplikasaun konseitu foun ida ne'e nian: tau hamutuk forsas F-FDTL no PNTL, hanesan resposta hasoru atentadus ne'ebé halo iha fulan Feveireiru tinan liubá.

Maski idaidak ho nia misaun ne'ebé la hanesan, maibé tanba hala'o hamutuk ho forma konsertada, Insituiones rua ne'e konsege atinje obetivu komún, hodi garante seguransa ba populasoens no ba sira nia rikusoin tomak. Karik la'o mesamesak, mak sira sei la hetan rezultadus ne'ebé hanesan, ho susesu boot.

Buat ne'ebé sira aprende liuhusi operasaun ida ne'ebá mak loke dalan ba elaborasaun Lei kona-ba Seguransa Nasionál no Lei kona-ba Defeza Nasionál. Ita agora kria daudauk Sistema Integradu ba Seguransa Nasionál, ne'ebé entidades hotu-hotu ho responsabilidades iha área setór seguransa, haré tuir konseitu ne'ebé kle'an liu, enkuadara no artikula malu hamutuk.

Sistema Integradu ba Seguransa Nasionál hatuur, liu-liu iha vértise ka pontu aas ida ne'ebé kompostu husi Defeza, Seguransa Interna no Protesaun Sivíl.

Atu bele hasoru ho susesu amezas ne'ebé bele tau iha perigu sosiedade timorensé tomak nia vivénsia ka moris loroloron nian, importante katak Forsas Armadas, Polísia no Protesaun Sivíl servisu hamutuk hodi bele atinje fin ka objetivu ida de'it mak: atu garante independénsia no soberania poder polítiku, unidade no integridade territóriu nasional i liberdade ho seguransa populasoens tomak nian.

F-FDTL tenke prepara-an atu hala'o misoens foun ne'ebé kontempla iha Lei Seguransa Nasionál, liu-liu kona-ba atu fó tulun ba populasoens ne'ebé hetan dezastres ka kalamidades públikas.

Auxíliu militár relaciona ho ajuda umanitária no jestaun emerjênsias, oras ne'e sai importante liután ona, ne'ebé presiza iha koordinasaun no kolaborasaun ativa ho autoridades Estadu sira seluk hanesan polísia i protesauun sivíl, no mós ho entidades ne'ebé responsáveis ba transportes, infra-estruturas, servísius saúde, solidariedade i assistênsia sosiál.

Aleinde ida ne'e, envolvimentu entidades naun governamentais no apoiu parseirus desenvolvimentu, hamutuk ho kapitál experiênsia ne'ebé hetan ona, fundamentais tebes ba prosesu aprendizajen atu bele hadi'a ita nia kapasidades, ita nia organizasaun i koordinasaun mekanizmus.

Senhoras no Senhores,

Rekursu ba Engenharia Militar buat ida ke inovadór tebes ba ita nia Forsas Armadas, tanba ne'e, presiza explora lailais. F-FDTL sira mós bele, no tenke dezempenha papél preponderante ka boot liu iha área ne'ebé ita sei kuran buat barak, hanesan iha konstrusaun ka rekonstrusaun infra-estruturas, tanba importante tebes ba desenvolvimentu ekonómiku País ne'e nian, i, konseqüentemente, atu bele hadi'a ita nia Povu tomak nia kondisoens moris.

Ha'u hein katak liuhusi semináriu ida ne'e, bele define klaru liután formas oinsá atu emprega Forsas Armadas, especialmente nia Engenharia Militar, iha misoens ne'ebé tuir âmbito Protesauun Sivíl no Ajuda Umanitária.

Mai ita servísiu hamutuk atu nune'e iha tempu badak, ita nia Engenharia Militar, husi "mehi" bele sai tebes realidade.

Obrigadu barak.

Kay Rala Xanana Gusmão

25 Setembru 2009